

Ubutumwa bwa Komite Nyobozi y'Inama Mpuzamahanga y'Amatorero kw'Isi (WCC): Tugumane ikizere cyo kurandura Sida

Tariki ya 27 Gicurasi 2019

Ubutumwa: Tugumane ikizere cyo kurandura Sida

Nuko natwe ubwo tugoswe n'igicu cy'abahamya bangana batyo, twiyambure ibituremerera byose n'icyaha kibasha kutwizingiraho vuba, dusiganirwe aho dutegukwa twihanganye

Abaheburayo 12:1 (Bibiliya Yera)

Mu 2021, ubwo Inteko Rusange ya 11 y'Inama Mpuzamahanga y'Amatorero kw'Isi izaba iterana, isi na yo izaba yizihiza imyaka 40 indwara ya Sida imaze ivumbuwe. icyorezo cya virusi itera Sida cyashegeshe isi kurusha ikindi cyorezo icyo ari cyo cyose. Mu myaka igera kuri mirongo ine, Sida imaze guhitana miliyoni na miliyoni z'abantu, isenya imiryango na sosiyete ndetse inabera ihurizo rikomeye abanyabwenge n'abaganga badahwema kugerageza gushakira urukingo cyangwa umuti. N'ubwo twishimira ko hari intambwe zigaragara zimaze guterwa mu rwego rw'ubuvuzi aho miliyoni z'abantu zimaze kugezwaho uburyo bwizewe bwo kuyirinda n'imiti igabanya ubukana ndetse bikaba binatanga ikizere cyo kuba virusi itera Sida n'ibindi byorezo bizagera aho ntibyongere kwandurwa ukundi, icyorezo cya virusi itera Sida kiracyari ikibazo.

Igituma indwara ya Sida irushaho guhangayikisha cyane n'icyuho cy'akarengane, ubusumbane no kutagira kirengera kirushaho kugaragara muri sosiyete, ndetse no kuba itavugwaho rumwe, igahakanwa ndetse hakabaho no gucirana imanza mu gihe yo ikomeje guhitana benshi. Imbogamizi zo kurwanya icyorezo cya virusi itera Sida ntizigarukira gusa ku kubona imiti no guhabwa serivisi zijyanye n'ubuvuzi, ahubwo usanga hiyongeraho izindi mbogamizi; nk'akato gahabwa abayirwaye n'ivangura ribakorerwa, ubwoba, imibereho n'ubushobozi.

Mu rugamba rwo guhangana n'indwara ya Sida, tugomba kwibanda ku bantu barimo ababana n'ubwandu bwa virusi itera Sida n'abashobora kuyandura ndetse n'ababitaho. Kuba bene abo bantu bahari, ubuzima banyuzemo ndetse n'uruhare rwabo bigomba guhabwa umwanya ukomeye mu rugamba rw'amadini n'amatorero mu kurwanya indwara ya Sida. Twemera neza uruhare rw'abo bantu babana n'ubwandu bwa virusi itera Sida mu kutwigisha ndetse akaba ari na bo batuma abakora ubushakashatsi mu rwego rw'ubuvuzi barushaho kubona ibimenyetso bifatika bashingiraho bashaka umuti. Ubuhamya bwabo ndetse no kubana natwe ubwabyo ni impano ikomeye ku bihugu byacu na sosiyete zacu.

Kuva iki cyorezo cyavuka, Inama Mpuzamahanga y'Amatorero kw'Isi yagiye ifata ingamba zitandukanye zo kukirwanya binyuze mu nyigisho zitangwa n'abanyamadini, mu bikorwa

ndetse no mu buhanuzi bukorwa. Guhera ku Butumwa bwa Komite Nyobozi bwo mu 1986 kuri SIDA n'amatorero ukagera ku Ibaruwa igenewe abanyamadini yo mu 2016 yanditswe n'Inama y'Ubuyobozi y'Inama Mpuzamahanga y'Amatorero kw'Isi, "Amatorero yiyemeje gukaza urugamba rwo guhashya virusi itera Sida," twe nk'abanyamatorero twahisemo kubahiriza inyigisho zo muri Bibiliya zijyanye no kubaha ikiremhamuntu, kurangwa n'urukundo ndetse no kwifatanya n'ababaye.

Tugiye kumara imyaka mirongo ine duhanganye n'indwara ya Sida, ariko ntituzigera na rimwe duteshuka kuri uwo murimo n'iyi ntego twihaye.

Komite Nyobozi, yateraniye i Bossey, mu Busuwisi, kuva itariki ya 22 kugeza ku ya 28 Gicurasi 2019, irahamagarira amatorero agize Inama Mpuzamahanga y'Amatorero kw'Isi (WCC):

- Kongera gusuzuma ingamba zabo bagashyira imbere gahunda zigamije kurwanya indwara ya Sida;
- Kongera ingufu mu bikorwa bigamije kwirinda guha akato abanduye virusi itera Sida no kwirinda ivangura ribakorerwa;
- Kurushaho gufasha abarwayi ba Sida kubona imiti na serivisi zitangwa mu matorero yacu no muri sosiyete tubamo;
- Kongera ubutumwa n'ibiganiro bitangwa ku bibazo bituma abantu bishora mu bikorwa bituma bandura indwara ya Sida;
- Kongera inkunga zigenerwa gahunda zigamije kurwanya indwara ya Sida;
- Kwifatanya n'abandi mu buvugizi bukorwa mu matorero, mu miryango ikorera mu gihugu n'imiryango mpuzamahanga hagamijwe kurandura iki cyorezo.